

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 37/10

29 նոյեմբերի 2016թ.

Քննարկվեց «ԱԻԳ» ՍՊԸ գանգատը ՀՀ ԿԱ ՊԵԿ Գուգարքի տարածաշրջանային մաքսատան պետի 03.10.2016թ. թիվ 68/16 որոշման դեմ:

«ԱԻԳ» ՍՊԸ գանգատում բերված փաստարկները.

ՀՀ օրենքի պահանջները (ՀՀ կառավարության 23.04.2014թ. թիվ 447-Ն որոշում) չիմանալու հետևանքով 2016թ. հունիս ամսվա համար մինչև հուլիսի 10-ը չէր ներկայացվել մաքսային վիճակագրական հաշվետվություն: Գուգարքի տարածաշրջանային մաքսատան կողմից տեղեկացվելով այդ մասին, համապատասխան ծածկագիր և գաղտնաբառ ստանալով, 01.08.2016թ. մինչև 10.08.2016թ. ժամանակահատվածում ներկայացվել են հաշվետվություններ հունիս և հուլիս ամիսների համար: Սակայն հաշվետվություններում կային սխալներ, և ընկերությունը գրավոր դիմել է ՀՀ ԿԱ ՊԵԿ նախագահի տեղակալին հաշվետվություններն անվավեր համարելու համար: Հաշվետվություններն անվավեր համարվելուց հետո օգոստոսի 12-ին հանձնվել են ճշտված հաշվետվություններ:

24.08.2016թ. ՀՀ ԿԱ ՊԵԿ ԳՏՄ պետի կողմից կայացված որոշման հիման վրա Արտաշես Աբգարյանի նկատմամբ նշանակվել է վարչական տուգանք նախագգուշացման ձևով, ուշացված հաշվետվությունների համար:

ՀՀ ԿԱ ՊԵԿ Գուգարքի տարածաշրջանային մաքսատան պետի կողմից կայացված 03.10.2016թ. թիվ 68/16 որոշման հիման վրա Արտաշես Աբգարյանի նկատմամբ նշանակվել է վարչական տուգանք 50.000 դրամ, հուլիս ամսվա սխալ լրացված հաշվետվության համար, հիմք ընդունելով ՀՀ կառավարության 23.04.2014թ. թիվ 447-Ն որոշման 7-րդ, 8-րդ և 10-րդ կետերի պահանջները: Սակայն նույն որոշման 9-րդ կետում ասվում է, որ եթե դիմողը հայտնաբերում է, որ վիճակագրական ձևի լրացման ժամանակ թույլ են տրվել սխալներ, ապա նա կարող է սխալը հայտնաբերելուց 10 օրվա ընթացքում ներկայացնել դիմում նախորդ ձևն անվավեր ճանաչելու վերաբերյալ և ներկայացնել նոր վիճակագրական ձև, ինչը կատարվել է: 03.08.2016թ. և 10.08.2016թ. սխալ ներկայացված հաշվետվությունները դիմումով անվավեր են ճանաչվել 12.08.2016թ. և նույն օրը՝ 12.08.2016թ., ներկայացվել են ճշտված հաշվետվություններ:

Արդյոք 447-Ն որոշման 9-րդ կետի հիմքով ճշտված հաշվետվությունները չեն համարվում ժամկետում ներկայացված, չէ որ ճշտված հարկային հաշվետվությունները չեն համարվում ժամկետանց:

Ելնելով վերոգրյալից՝ գանգատաբերը խնդրում է վերանայել վարչական տուգանքը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ ԳՏՄ պետը, ուսումնասիրելով «ԱԻԳ» ՍՊԸ տնօրեն Արտաշես Աբգարյանի կողմից վարչական իրավախախտում կատարելու վերաբերյալ նյութերը պարզել է, որ 01.08.2016թ. թիվ 02/7-1/1185576-16 գրությամբ ՀՀ ԿԱ ՊԵԿ ԳՏ մաքսատուն է ուղարկվել 01.08.2016թ. դրությամբ ԵՏՄ անդամ երկրների հետ փոխադարձ առևտուր իրականացրած և հաշվետվություններ չներկայացրած (կամ սխալ ներկայացրած) կազմակերպությունների և անհատ ձեռնարկատերերի ցանկը: Ըստ այդ ցանկի, «ԱԻԳ» ՍՊԸ-ն հունիս-հուլիս ամիսներին լրացրել է 4 տարանցիկ հայտարարագրեր, որոնցից երեքի վերաբերյալ ներկայացրել է վիճակագրական հաշվետվություն, իսկ մեկի վերաբերյալ չի ներկայացրել: Մասնավորապես, գործի նյութերի ուսումնասիրությունից պարզվել է, որ ընկերությունը հունիս և հուլիս ամիսներին կատարել է 4 գործարք՝ երկուսը հունիսին, երկուսը հուլիսին: Հունիս ամսին վիճակագրական հաշվետվությունը սահմանված ժամկետում չներկայացնելու համար ընկերության տնօրենի նկատմամբ 24.08.2016թ. կիրառվել է վարչական տույժի տեսակ՝ նախազգուշացում: Այնուհետև հուլիս ամսին՝ 13.07.2016թ. և 20.07.2016թ. ընկերության կողմից կատարվել են արտահանումներ, որոնց համար 03.08.2016թ. և 10.08.2016թ. ներկայացվել են վիճակագրական հաշվետվություններ: Սակայն վերջիններս սխալ են լրացվել, որոնք 12.08.2016թ. անվավեր են ճանաչվել և լրացվել են նոր հաշվետվություններ:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 169.2 հոդվածի դրույթներով ՀՀ ԿԱ ՊԵԿ Գուգարքի տարածաշրջանային մաքսատան պետի կողմից 03.10.2016թ. կայացվել է թիվ 68/16 որոշումը, որի համաձայն ընկերության տնօրեն Արտաշես Աբգարյանի նկատմամբ կիրառվել է վարչական տույժ՝ գումարով 50.000 դրամ:

Քննարկվող դեպքում 13.07.2016թ. և 20.07.2016թ. ընկերության կողմից կատարվել են արտահանումներ, որոնց համար 03.08.2016թ. և 10.08.2016թ. ներկայացվել են վիճակագրական հաշվետվություններ: Սակայն վերջիններս սխալ լրացված լինելու հետևանքով 12.08.2016թ. անվավեր են ճանաչվել և նույն օրը ներկայացվել են նոր հաշվետվություններ:

Վարչական իրավախախտումների վերաբերյալ ՀՀ օրենսգրքի 169.2 հոդվածի համաձայն՝ իրավաբանական անձանց, օտարերկրյա իրավաբանական անձանց՝ Հայաստանի Հանրապետության տարածքում գործող առանձնացված ստորաբաժանումների, պետական և տեղական ինքնակառավարման մարմինների, հիմնարկների պաշտոնատար անձանց, անհատ ձեռնարկատերերի կողմից պետական վիճակագրական հաշվետվությունները և պետական վիճակագրական դիտարկումներին վերաբերող այլ փաստաթղթերը չներկայացնելը կամ սահմանված կարգի խախտումով (սահմանված ժամկետների կամ ամբողջ ծավալի խախտումներով կամ աղավաղումներով) ներկայացնելը՝ առաջացնում է նախազգուշացում կամ տուգանքի նշանակում՝ սահմանված նվազագույն աշխատավարձի քսանապատիկի չափով:

ՀՀ կառավարության 2014 թվականի ապրիլի 23-ի N 447-Ն որոշման Հավելված N

1-ի 9-րդ կետի համաձայն՝ եթե դիմողը հայտնաբերում է, որ վիճակագրական ձևի լրացման ժամանակ թույլ են տրվել սխալներ, ապա նա կարող է սխալը հայտնաբերելուց 10 օրվա ընթացքում ներկայացնել դիմում՝ նախորդ ձևն անվավեր ճանաչելու վերաբերյալ և ներկայացնել նոր վիճակագրական ձև:

Տվյալ դեպքում ղեկավարվելով ՀՀ կառավարության 2014 թվականի ապրիլի 23-ի N 447-Ն որոշման Հավելված N 1-ի 9-րդ կետի պահանջներով 03.08.2016թ. և 10.08.2016թ. ներկայացված վիճակագրական հաշվետվություններում սխալներ հայտնաբերելուց 10 օրվա ընթացքում ընկերության կողմից ներկայացվել է դիմում՝ նախորդ ձևերն անվավեր ճանաչելու վերաբերյալ, ինչպես նաև ներկայացվել են նոր վիճակագրական ձևերը:

Ելնելով վերոգրյալ փաստական հանգամանքներից՝ Հանձնաժողովը գտնում է, որ տվյալ դեպքում ընկերության տնօրեն Արտաշես Աբգարյանի նկատմամբ Վարչական իրավախախտումների վերաբերյալ ՀՀ օրենսգրքի 169.2 հոդվածով նախատեսված տուգանքի փոխարեն պետք է կիրառվեր նույն հոդվածով նախատեսված նախազգուշացում պատասխանատվության տեսակը:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո ր ո շ ու մ է՝

Բեկանել ՀՀ ԿԱ ՊԵԿ Գուգարքի տարածաշրջանային մաքսատան պետի 03.10.2016թ. թիվ 68/16 որոշումը, իսկ գործը՝ կարճել:

Հանձնաժողովի նախագահ՝



Վ.ՄԻՐՈՒՄՅԱՆ